

Monumento pa heroenan di segundo guerra mundial lo ser inaugura pa Prins Willem Alexander



ORANJESTAD (AAN): E bunker cu a ser construi na Wayaca net dilanti di Aeropuerto Internacional Reina Beatrix, pa warda dinamita antes na aña 1953, ta ser converti den un museo pa rindi honor na miembronan di Schutterij, kendenan a defende nan pais Aruba, durante di e Segunda Guerra Mundial.


Ya caba trabaonan di reparacion a inicia y trabaonan na entrada di e bunker ta tumando lugar, sperando riba su apertura e luna aki.

Tin un comision special pa traha riba e proyecto aki, y cu lo mester culmina cu apertura di e museo door di Su Alteza Real Prins Willem Alexander durante su bishita di dia na Aruba dia 20 di April

venidero.

Den e museo lo rindi honor na e heroenan di Aruba, kendenan a defende nan isla durante di Segunda Guerra Mundial y kendenan di e forma aki lo haya un reconocimiento husto pa nan envolvimento den e guerra mundial aki cu tambe tabatin su efecto riba nos pais.

E comision encarga cu e proyecto aki lo duna mas in-



formacion riba funcionamiento di e museo y como parti di e reconocimiento aki, lo bay staciona e avion DAKOTA di aña 1941, cu na e momentonan aki ta riba tereno di Aeropuerto Internacional Reina Beatrix, riba e tereno banda di e museo, pa completa e museo unico aki. Proximo fin di siman lo prepara e avion Dakota pa su transporte mientras cu

Diadomingo tempran lo lastra e avion hiba pa e tereno banda di e bunker na Wayaca. E bunkernan original cu a ser usa den Segunda Guerra Mundial na Wayaca, ya no ta existi mas ya cu debi na construccion di aeropuerto Reina Beatrix, esakinan a ser elimina den pasado, pero a scoge pa e bunker pa converti esaki den e museo di nos heroenan.